

**KOSMO 21/11/2011**

## **Pelbagai aktiviti sempena Hari UNESCO Malaysia**

19/11/2011 3:41pm

KUALA LUMPUR – Pelbagai aktiviti termasuk pameran, persembahan kebudayaan dan permainan tradisional diadakan sempena sambutan Hari Pertubuhan Pendidikan Saintifik dan Kebudayaan Bangsa-Bangsa Bersatu (UNESCO) Malaysia di Pasar Seni di sini, hari ini.

Sambutan yang julung kali diadakan itu bertujuan meningkatkan visibiliti dan peranan Suruhanjaya Kebangsaan UNESCO Malaysia (SKUM) di peringkat kebangsaan selain meningkatkan jalinan kerjasama antara SKUM dengan agensi kerajaan, badan bukan kerajaan (NGO) dan orang awam.

SKUM dianggotai enam Jawatankuasa Kecil Tetap iaitu Kementerian Pelajaran Malaysia (KPM), Kementerian Pengajian Tinggi, Kementerian Penerangan Komunikasi dan Kebudayaan, Kementerian Sains, Teknologi dan Inovasi, Kementerian Pembangunan Wanita, Keluarga dan Masyarakat dan Kementerian Luar.

Sambutan yang berlangsung dari 10 pagi hingga 6.30 petang itu terbuka kepada orang ramai termasuk pelancong asing untuk melihat dengan lebih dekat penglibatan Malaysia dalam UNESCO.

Sambutan Hari Unesco Malaysia dirasmikan Timbalan Perdana Menteri Tan Sri Muhyiddin Yassin dalam satu majlis berlainan di sini, semalam. - Bernama